

առուրս բազումք 'ի հրէից և յայլազգեաց՝ դիմեցին առ Դատաւորն . թէպէտ նա սաստեաց նոցա , այլ 'ի լրման ժամանակի իւրոյ էառ 'ի Հայոց փոխանակադիր 17,200 զահեկանի՝ հատուցանել 'ի Կոստանդինուպօլիս . իբրեւ եկն նոր Դատաւորն , վերստին յարեան պարտատեարք , և զի յօժար էր նա 'ի լսել զդատաստանս նոցա , և 'ի լռեցուցանել զնա և զՔաղաքապետն՝ դիմեցին պարտատեարք 'ի դուռն վանաց որդւովք և ընտանեօք , մանաւանդ հըրէայք , և մտեալ 'ի գաւթ եկեղեցւոյն և 'ի սենեակս միաբանաց աղաղակէին և նախատանօք խնդրէին զառնելիս իւրեանց , և այս ոչ միանգամ և երկիցս , այլ բազում անգամ . մինչեւ անճարացեալ միաբանաց ելին արտաքս աղաչէին զնոսա , և 'ի ձեռն Խախամագլխի նոցին դարձուցին 'ի տեղիս իւրեանց , և 'ի յառնել այլոց պարտատեարց , և 'ի դիմել առ Դատաւորն՝ հազիւ կարացին չիջուցանել զհրդեհ բարկութեան նոցին 'ի ձեռն Դատաւորին , և այլ այսպիսի խառն 'ի խուռն տագնապ և յուսաբեկ նեղութիւն , զորոց երկար գրեն : Գրեցին եւ վասն հաշուոց և արդեանց նուիրակաց՝ և այլոց իրաց : Ոմանք յերեւելեաց ուխտաւորաց տարւոյն , որք եկեալ էին յայլ և յայլ քաղաքաց , տեսեալ զԱթոռն առանց զլիսոյ և գահակալի , զԹշուառութիւնս միաբանաց , զբռնութիւնս դժնեայ պարտատեարց , միաբանեալ ցաւ 'ի սիրտ գրեցին գիր բազմակնիք 'ի Կոստանդինուպօլիս առ գլխաւորս ազգին , և աղաչանօք թախանձէին զնոսա դարձուցանել առ վայր մի զաչս իւրեանց յերուսաղէմ , բառնալ զնախատինս ազգին , և այցելութեամբ դարմանել զվէրս նորա , զի մի առաւել զայրասցի անհոգութեամբ :

Լիւսդրացի Յակոբ եպիսկոպոս՝ որ նստէր 'ի Սիդոն փոխ հիւպատոս Անգղիոյ , 'ի սոյն ամի ա'ռ գիր 'ի Բգեշխից Դամասկոսի և Աքքէի , և առաքեաց Ոստիկանս յերուսաղէմ և խնդրէր 'ի Խորհրդականաց զտոկոսիս 50,000 դահեկանի առնելեաց իւրոց , և Ոստիկանն կամէր 'ի գլուխ տանել զայս գործ 'ի ձեռն Դատաւորին՝ այլ իմացեալ Հայոց 'ի բարեկամաց , ծանուցին նմա զաղքատութիւն վանաց , եւ որսալով զմիտս Ոստիկանին դարձուցին ունայն յետս . այլ յետոյ իմացան զի Յակոբ պատրաստէր զայլ